

Samarbeidsavtale for Vestlandsrådet

Gjeld frå 1. januar 2020

§ 1 Generelt

Vestlandsrådet er eit politisk samarbeidsorgan for fylkeskommunane på Vestlandet.

Samarbeidet er oppretta av og vert drive av Møre og Romsdal, Vestland og Rogaland.

Vestlandsrådet er oppretta i medhald av kapitel 18 i kommunelova. Kommunelova og anna relevant regelverk som gjeld for fylkeskommunane gjeld og for alt arbeid knytta til rådet.

Vestlandsrådet er ikkje ei sjølvstendig juridisk eining.

Mandatet til Vestlandsrådet er regulert gjennom denne samarbeidsavtalen og ved overført mynde frå fylkestinga i dei deltakingande fylkeskommunane.

Samarbeidsavtalen legg vekt på det politiske samarbeidet og skal styrke den politiske leiarskapen i rådet.

Arbeidet i Vestlandsrådet skal byggje på rausheit, respekt for kvarande sine særpreg og ei positiv innstilling til samarbeid.

Medlemsfylka pliktar å setta av administrative ressursar for å følgja opp dei vedtaka Vestlandsrådet gjer.

Samarbeid om enkeltprosjekt skal som hovudregel gjennomførast i regi av to eller fleire av medlemsfylka.

I tillegg til det som er regulert gjennom samarbeidsavtalen, er fylka samde om følgjande køyreregjar for samarbeidet:

- Medlemsfylka forpliktar seg til å informere rådet om saker som kan vere av felles interesse.
- Medlemsfylka skal vere opne for samarbeid med andre fylke utanom Vestlandsrådet i saker der dette fell naturleg.

§ 2 Føremål

Dei tre fylkeskommunane på Vestlandet skal gjennom Vestlandsrådet:

- styrke landsdelen, både nasjonalt og internasjonalt
- koordinere den politiske innsatsen til beste for landsdelen innanfor definerte satsingsområde
- fremje andre politiske saker av felles interesse
- aktivt påverke rammevilkår for landsdelen og medlemsfylka
- skape samhandlingsarenaer på Vestlandet
- ta initiativ til samarbeidsprosjekt på tvers av fylkesgrensene

§ 3 Samansetting

Vestlandsrådet har 6 medlemmer med varamedlemmer frå kvar av dei tre deltakande fylkeskommunane. Desse vert valde for valperioden av og frå fylkestinget sine medlemmer. Fylkesordførar og fylkesvaraordførar skal vera medlem av rådet.

Den einskilde fylkeskommune har høve til å skifta ut medlemmer og varamedlemmer i løpet av valperioden. Nyval skjer då for resten av perioden.

Vestlandsrådets medlemmer er representantskap etter § 18-3 i kommunelova.

Storbyane Bergen og Stavanger har høve til å møta som observatørar med talerett.

§ 4 Leing

Leiarvervet skal alternera mellom fylkesordførarane i dei deltakande fylkeskommunane med periodar på eitt år om gangen.

Rådet kan avvike dette dersom det er særlege grunnar, t.d. for å tilpasse leiarskapen fylkestingsval.

Fylkesvaraordføraren i neste leiarskapsfylke er nestleiar for rådet.

§ 5 Arbeidsutval

Dei tre fylkesordførarane er arbeidsutval (AU) for rådet.

AU skal vera eit organ som set den politiske dagsorden og som tek avgjerd i saker mellom møta der dette er nødvendig.

Rådet kan delegera til AU å fatta vedtak.

Møta i AU kan haldast via telefon/videokonferanse dersom det ikkje er høveleg å møtast fysisk.

§ 6 Sekretariat

Fylkesdirektøren i den fylkeskommunen som til ei kvar tid har leiarvervet

- har innstillingsrett til rådet
- har ansvaret for sekretærfunksjonen
- koordinerer det administrative og saksførebuaende arbeidet
- koordinerer i samarbeid med dei andre fylkeskommunane arbeidet med prosjekt som er sett i gang av Vestlandsrådet
- har arkivansvar

§ 7 Møter i Vestlandsrådet

Det vert normalt halde minst tre møte i året. Møta skal så langt råd er fordelast på dei tre samarbeidande fylka. Når AU finn det tenleg, kan eit møte leggst til andre stader.

Leiaren i rådet kallar inn til møte til dei tidspunkt rådet eller AU sjølv har fastsett.

Elles vert møte halde når leiaren eller minst $\frac{1}{4}$ av medlemene i rådet krev det.

Leiaren set opp sakliste for det einskilde møtet. Saklista og andre dokument skal vera tilgjengeleg får ålmenta, med mindre dei er unnateke offentleggjering.

Innkalling med link til sakliste og saksdokument skal som hovudregel sendast rådsmedlemene minst ei veke før møtet.

Møta i rådet er opne, om ikkje anna følgjer av lovfesta teieplikt eller andre reglar gjevne i eller i medhald av lov.

Rådet gjer vedtak i møte. Det skal førast møtebok over forhandlingane.

§ 8 Økonomi – budsjett - rekneskap

Dei tre fylkeskommunane yter ein like stor sum kvar til drifta av rådet. Storleiken vert handsama på siste møte før budsjettåret. (For 2020, kr 600.000,-)

Eigne driftsutgifter til deltaking i rådet vert dekkja av kvar einskild fylkeskommune.

Leiarskapet i rådet vert dekkja av den fylkeskommunen som har leiarskapen det året.

Rådet skal ha eit eige budsjett til dekking av andre typar driftsutgifter til rådet av felles interesse for dei deltakande fylkeskommunane. Rådet skal sjølv gjere framlegg om dette. Kvar av fylkeskommunane skal dekkja 1/3 av desse utgiftene. Budsjettet vert handsama på første møtet i året.

Utgifter til einskildprosjekt vert fordelte i høve til kvar fylkeskommune sine interesser og deltaking.

Rekneskapen vert ført og revidert av den fylkeskommunen som har leiarskapen/ sekretariatet.

§ 9 Endring av samarbeidsavtale

Endringar i denne samarbeidsavtalen som er dekkja av § 18-4, fjerde ledd i kommunelova må vedtakast av fylkestinga i alle dei deltakande fylkeskommunane. Vestlandsrådet skal uttala seg på førehand.

Andre endringar kan vedtas av rådet sjølv med 2/3 fleirtal, jfr § 18-4, tredje ledd.

§ 10 Oppseiing/opphør av samarbeidet

Fylkestinget i eitt av dei samarbeidande fylka kan vedta at denne fylkeskommunen skal gå ut av samarbeidet i rådet med 1 – eitt års oppseiingsfrist før neste kommuneval.

Vestlandsrådet er å sjå på som oppløyst når minst to av dei tre samarbeidande fylka har trekt seg ut.